

# ¡CREBAR AS LIRAS!

## 1881

Por sobre a barafunda  
de escarnios e pauliñas  
que as cántigas dos servos  
por onde quer suscitan,  
espaventada, atóneta,  
a virxe Poesía  
clamou desalentada:  
“¡Vates, crebade as liras!”

¡Crebar as liras,  
cando se fai temer aínda  
a maza de Xan Dente  
por vara de xusticia!  
¡Cando nos nosos Códigos  
non val dun home a vida  
os sete vis escudos  
en que a tasou Molina!

¡Calar!... ¡Que non se escoite  
o patuxar das vítimas  
no mar de inxofre e sangue  
da escravitú caídas!  
¡Calar!... ¡i as maus cravadas,  
i a túnica cinguida,  
i a tolerancia abaixo  
i a intolerancia arriba!

Non. Feita está a pormesa  
i é menester cumprila.  
A patria morre. ¡Malia  
o fillo que a non mira!  
¡E malia quen lle negue  
por tedio ou covardía,  
os himnos que a amortaxen,  
o sangue que a redima!

Crebar as liras diante  
da libertá que espira  
baixo a gadoupa férrea  
do dogma que asesina!...  
¡Inda goberna Claudio!  
¡Inda Seiano priva!  
¡Inda os proscritos choran  
e trunfa Mesalina!

¡Non a crebés, poetas!

Templaina en ódeo, en ira,  
hastra que dela saian  
as explosiós das minas;  
hastra que cada nota  
com' onha espada fira,  
com' on andacio varra  
as vellas tegonías.

Gustoso esnaquizara  
e resinado a miña,  
si neso do meu pobo  
a sorte consistira;  
mais, mentras orfo e triste  
os meus consolos pida,  
crebala... ¡na túa testa  
tan sólo-tiranía!